

# Cun sportistas e sportists da noss chantun

Losanna: Avertura Gieus olimpics da giuvenils

DA GION NUTEGN STGIER / FMR

■ Oz è a Losanna l'avertura da la terza ediziun dals Gieus olimpics d'enviern da giuvenils. Da la partida èn er 112 atlets ed atletas da la Svizra. Al cader naziunal appartegnan er tschintg sportistas e trais sportists dal Grischun. Suenter Puntina il 2012 e Lillehammer il 2016 segna Losanna per l'organisaziun da la terza ediziun dals Gieus olimpics d'enviern da giuvenils (Youth Olympic Games YOG). Quels entschai-van oz e cuzzan fin ils 22 da schaner. Cun esser la Svizra quest onn ospitanta ha ella il dretg da trametter dapli sportistas e sportists a l'occurrenza internaziunala. La delegaziun svizra è represchentada a Losanna cun 112 atlets ed atletas e 77 trenaders, assistents e coaches. Dal reminent tar la medema occurrenza avant 12 onns en Austria ha il team svizzer fatg nov medaglias e quatter onns sissur a Lillehammer schizunt 12 medaglias. Las pli grondas schanzas da far medaglias a Losanna han cunzunt ils sportists e las sportistas da la Svizra en las disciplinas da turas da skis.

## En tut 1880 atlets ed atletas

A l'event mundial sa participeschan 1880 sportists e sportistas che derivan da 70 naziuns. Ils atlets e las atletas èn tranter 15 e 18 onns. Cumbatti per medaglias vegn en 16 disciplinas cun en tut 81 decisius. Noss sportists e nossas sportistas



Oz cumenza a Losanna la terza ediziun dals Gieus olimpics d'enviern da giuvenils.

MAD

èn da la partida en 15 disciplinas. Las 56 mattas ed ils 56 mats dal cader svizzer derivan da 21 chantuns. Dal Grischun èn vegnidas selecziunadas per Losanna 2020 las tschintg suandantas sportistas: *Mona Danuser*, Flem (snowboard), *Bianca Gisler*, Scuol (snowboard), *Marina Kälin*, San Murezzan (passlung), *Marlen Sophie Perren*, Tavau (biatlon) e *Sandra Schmidt*, Sent (hockey). Ils trais sportists sa numnan: *Nicola Bolinger*, Zuoz (ski freestyle), *Silvano Gini*, Champfèr (ski alpin) e *Nico Zarucchi*, San Murezzan (cumbinaziun nordica).

## Cursas er a San Murezzan

Las occurrenzas da sport han lieu en otg lieux, tranter auter a Losanna, Leysin, Les Diablerets, Villars e Champéry. Las cursas da bob, skeleton e scarsolar, quellas han lieu a San Murezzan. Sin il lai da San Murezzan vegnan ad avair lieu las cursas da patinadi da sveltezza. Cun uss esser l'aua schelada avunda èsi pussaivel da manar tras las cursas sco previs sin il lai da San Murezzan. L'alternativa fiss stada da far las cursas al «Lej da Staz», in lai en la vischinanza da San Murezzan. Las disciplinas nordicas (passlung e biatlon),

quellas han schizunt lieu ordvart la Svizra e quai en Frantscha a Les Tuffes.

## Er il rumantsch è represchentà

A Losanna na manca er betg il rumantsch cun far part al cader svizzer intgins sportists ed intginas sportistas da l'intschess rumantsch. La part rumantscha dal song uffizial «Start now» dals Gieus olimpics d'enviern da giuvenils 2020, chantà en tschintg linguas, chanta il Sursilvan *Ivo Orlik*, alias «Giganto». Per el è quai segir ina grond'onur da sa preschentar ad in public fitg internaziunal.